

# OMUKWE TU



40c

No. 20

ISBN 0-620-06828-0

## Natango Novomba 1,1988 oli li oshilakanenwa melunduluko lyuupolotika waNamibia

Oonkundathana dhoshigongi oshitihetatu kuNew York 6 - 9.10.1988, odha gandja etegameno enene lyompito yeikuthomo lyomatanga gAcuba muAngola, muile wethimbo ndyoka tali nyanyudha ayehe; Angola; Cuba; S.A naAmerica.

Oopaati adhihe dha tumbulwa metekelo odha zi momutumba ngoka dhi uvite ombili kethimbo ndyoka lya ziminathanwa, eikuthomo lyomatanga ngoka li pule oomvula mbali sigo oomvula mbali netata, konima yehogololo sho lya ningwa muNamibia nepangelo epe lya ya koshipundi.

Oonkundathana ndhoka dha li dha ningwa konima yiwike itatu ayike esiku lyotango lyaNovomba li thike, odha kolekulula esiku ndyoka olyo li ninge etameko lyokutulitha miilonga oshitokolitho 435, shoka tashi utha emanguluko lyaNamibia.

Esiku ndyoka (Novomba 1) etanga lyombili lya UNO (UNTAG) olya tagelelwa li thike muNamibia okutameka nomalongekidho galyo. Ongundu ndjoka yaanashilonga yligwanahangano oyo tayi hulitha po elelo ndyoka li li po ngashingeyi nokutaamba oshimpwiyu shoka tayi ke shi gandja kepangelo ndyoka tali ka za mehogololo lyoshigwana.

Iiwike iyali yotango yomwedhi nguka, ongundu yaantu 23, ya za ko UNO, oya tuminwe kuA-

## Elunduluko lyaanashilonga ya ELCIN

Elelongeleki leti 13 - 15.9.1988 eshi la ongala mEngela ola ninga omalunduluko manini kovana-shilonga mOngeleki ngaashi tashi landula:

Omudiakoni Maria Axel, mEkamba, ole mu nangeka kOluteyi. Omweevangeliste Nabot Imene, mOmulondo, okwa nangekwa kOnyaanya. Aveshe otava tameke lotete laNovomba. Omufita Stefanus Mvula, Okaku, okwa nangekwa omufita omuyakuli mOnguta okutameka Kotoba 1988

mushangandjayi, okukonakona omahala noompito dhokulongela UNTAG. Yamwe yomaa-konakoni mbaka oya thikile sigo opOniipa.



Ompumbwe yawo onene okupula ngele Ongeleki otayi vulu okukwatha mokugandja omahala, gokulongela nenge gokulala iilyo ya UNTAG. Ongeleki otayi indilwa wo ngele otayi vulu okugandja aatoloki, aahingi, aanambelewa, aahongi yipilangi okulonga pamwe naanashilo-

nga ya UNTAG.

“Kape na uuna emanguluko lyaNamibia lya li lya yela lya fa omumvo nguka,” osho Omunamibia gumwe a tumbula netegameno enene. Ihe oku na wo Aanamibia oyendji mboka yi itaala kutya omalongekidho agehe ngaka ga ningwa po omawanawa, S.A. ota vulu oku ga hanagula po esiku limwe alike.

Sebulon Ekandjo

## Ehekeleko

Otandi gandja omahekeleko kegumbo lyaTatekulu Awene alihe mOntonanga mOndonga, sho ya thigwa po komukadhona gwawo Magano (Awene) lipito moshiponga shoshihauto. Eimbilo 269, 2Kor.5:1-10

Anna Indongo

## Ombelewa yoshifo The Namibian ya fikwa po

Ombelewa yoshifonkundana sha simana moshigwana The Namibian, oya penduka 11.10.1988, ya pya. Iilongitho oyindji yoshifo oya pila mo. Kape na omuntu e chamekelwa mo. Shika osha ningwa pombali yuusiku mesiku lya tumbulwa metetekelo.

Ombelewa ndjoka naanashilonga yamo, oya kala nomahindo ogendji kepangelo lyopaukoloni okuza oshifo shoka sho sha tameke iilonga yasho 1985. “Napu kale otapu ningwa shike, tse onkene tatu tsikile niilonga yetu yoshifo”. osho omukuluntu gwoshifo Gwen Lister a tumbula. Omwedhi gwa yi, efolo Lister okwa adhika a zalekwa epapa muNew York omolwiilonga ya simana tayi longwa koshifo she.

## Ethaneko lyelandulathano lyegaluko lyAanamibia

Mboka ye li moshimpwiyu shomalongekidho, oya tungu nale ooprograma dhiinima nkene tayi ke enda, nonando eshilipaleko lya hugunina koshinima inali monika natango. Megaluko lyAanamibia okwathanekeka omikalo dhopaali nkene ye na okugaluka; okulungitha iihauto osho wo ondhila.

OMAHALA: Omahala gokuhelukila niihauto opwa thanekwa Ruacana, Oshikango, Oshakati, Ondangwa, Rundu, Kati-ma Mulilo, Okakarara, Gobabis, Aminius, Swakopmund nOngwediva.

Tala kep. 5

## South Africa noshitokolitho 435

Oyendji moshigwana shika otaa ime-meha ngashingeyi sho taa pulakene onkundathana dhokutulitha miilonga oshitokolitho 435, tadhi humu komeho. Ohashi popiwa wo tashi zi momalunza gamwe nokutya poshitaafula shoondathana, SA ina ya po a hala po, okwa thiminikilwa po.

Ngele shono tashi popiwa oshi li mondjila, nena omuntu ou na wo uumbanda womakotokelo kehe taga vulu okuningwa momalongekidho ga simana ge thike mpoka, ga kwatelela mo onakuyiwa ayihe yoshilongo.

Omalmobililo guumbanda mbuka otaga kolekwa kiiningwanima yometalelopo lyaatumwa ya-Amushangandjayi gwa UNO, koNamibia petameko lyomwedhi nguka, sho yi ile okulengalenga oshilongo nokukonga omahala gomayakulilo getanga lyombili lya UNO, sho tali ya li wilike ehogololo.

Mokuthika kwawo, Ongeleki oya kala tayi tseyithilwa kuAmushanga gwEpangelo lyOwambo, omusamane Frans Viljoen, kutya etalelopo lyawo kombelewangeleki, mpa kwa tiwa opo li li, mpa kwa tiwa kali po. Uule womasiku gatatu, etseyitho otali gandjwa ngeyi lya dhimbakana sigo oshikando shahugunialela sho ombelewa ndjika ya tseyithilwa ethimbo lyokuthika kwawo lya puka. Kutya omolwashike pwa kala iinima inaayi yela ngeyi, kape na ngoka e shi shi.

Patiyali omutumwa gwa UNO, nguka, omusamane Hocine Medili, gwoku-Algeria moonkundathana dhe naawilinge-leki, okwa holola onkumwe ye sho a lesha okaalita komagongalo gOngeleki ndjika, nkene omahala ngoka a lombwelwa nale kutya kage na aantu, gu udha omagongalo. Nomwaalu gwaakwanegongalo megongalo limwe, olwindingi ndishi ogu li 3000 sigo 7000?

Omuntu oto thigilwa ihe omapulo, kutya iitopolwa mbyoka aayenda ya tseyithilwa kaamu na aantu nando omo ye li, ngele ando ehokololo ndyoka inali opalekwa kOngeleki, andola osha fala melongekidho lya tya ngiini? Omiinima ishewe yinipo aakwiilongo mbeyaka ya pewa ehokololo inaali ihwapo, notashi ka fala momalongekidho ga tya ngiini?

Ngiika okuyele ngaa natango okutula omuthindo komalmobililo goludhi ndoka, ashike omuntu ou shi uvite ko kutya, okuningithwa oshinima inoo shi hala, omuntu iho shi ningi neiuvo lya yela.

Moshinima shelongekidho lyehogololo lyaayehe moshigwana shika, lya tegelelwa li kale lyoshili, li na uuyuuki nolya manguluka, SA oku li oshitsa shopokati, shoka kape na ngoka te shi ludhikitha. Ngele ye ita longekidha pashili nopauyuuki, omupya tagu ka adha oshigwana shika otagu tentekwa komutse gwe, ngaashi wo ta pulwa eyonuko alihe lya ningwa mevi ndika uule womimvo dha zi ko.

Sebulon Ekandjo

## Omatokolo amwe Elelongeleki 13 - 15.9.1988

399/88

Elelongeleki ola lesa ombapila yomutumwa mukulu Arvo Eirola omo ta popi kutya ota ka talelapo Ongeleki yetu muDesemba neudo (1988) pamwe nomukulukadi waye. Elelongeleki ola tambula eshiivifo nepandulo.

422/88

Elelongeleki la tambula nepandulo eshiivifo, kutya omufita Gerson Max okwa mana oprograma yelihongo laye muAmerika nokwa mona odjapo meyakulo lOngeleki moilando.

423/88

Elelongeleki ola ufa ku nyolwe ombapila i tuminwe ovapashukili voitaingeleki, ovafitaongalo nomaleloongalo, osho yo oomatrone moipangelo yetu, opo va konakone nawa oshinima shondjala moshigwana poo pu monike omwaalu wovanhu tava fi ondjala.

Embapila dekonakono nadi tumwe keembelewa dovapashukili fimbo efiku eti 15 laKotoba 1988 inali pita. Omukwafi vomumbisofi a fiilwa oshisho okunyola omukanda wa popiwa pombada.

427/88

Omolwokersesa kuJerusalem, 1989 ngashi hai longekidwa kOngeleki yaSweden (Church of Sweden Mission), Elelongeleki ola ufa ku ye omukulunhufikola wofikola yOmbimbeli koNKurenkuru, omufita Heikki Ausiku. Omuponhele waye omufita Vili - Heikki Shivute

Elelongeleki ola kundaneke kOkangudupitifi kalo, ombilive ya meme Christa Held, LWF tai popi omukifi woAids notai pula Ongeleki yetu ngeenge oi shii okuninga po sha mokukwafa ovanhu vetu.

ETOKOLO: Elelongeleki otali indile omukulunhu woshipangelo shaShakati dr Nestor Shivute nomukulunhu woshipangelo shaNandjokwe, dr Filemon Amaambo va konakone eendokumende edi da yandjwa voo va yandje enyamukulo letu kOngongahangano yOvakwaLuther (LWF).

Oilyo yokanguduwiliki kopombelewa yOngeleki pOniipa, ya ufwa i kale ngaashi tashi landula:

Moses Amkongo, omunashipundi  
Absalom Hasheela, pashilonga  
Set Son Shivute, hamushanga  
Filippus Amwele  
Monika Shivolo (Angula)  
Julius Mtuleni  
Loide Alweendo na  
Ester Akumbi  
Ovaponhele Anna - Katri Kapenda na  
Hileni Shilemba

460/88

MolwaJosefina Nathinghe ou ta i kelihongo, Elelongeleki ola tokola okukuta omupangeli John Pett, ponhele yaye efimbo alishe. Omushamane Pett okwa kala ta longo mOnandjokwe etatafimbo lolonga netata likwao okOngeleki yaAngilikana.

463/88

Elelongeleki ola kundafana kutya oshipalanyole shomudo tau ya 1989, otashi ka kala sha tya ngahelipi. Elelongeleki ola tokola oshipalanyole shi kale "Haakeenghono, ndele okomhepo yange," paSak 4:6

464/88

Ongalo yaKrisimesa yomudo 1988 ya ufwa kElelongeleki i tumwe kuMalaysia, kOngeleki yedina The Basel Christian Church of Malaysia (BCCM), koprojeka younafaalama i li monhele Kalingau, Kotakinabalu - Sabah - Malaysia.

468/88

Elelongeleka ola shiivifilwa, kutya omolwoshiponga shoboma meembelewa da FELCSA ku Johannesburg, oshoongalele oshinene shaFELCSA osho sha li sha ufwa shi kale ko pexulilo laKotoba neudo mOngwediva, osha undulilwa komudo tau uya pehovel. Omukwafi womubishofi M.Amadhila a fiilwa oshisho a shangele FELCSA ombapila tayi holola euditopamwe letu kuvo.



Momahuliloshiwike gamwe ohaku kala omapukululosikola kombinga yoonote mOngwediva. Aanona naakuluntu oyi itulamo, okuza momagomngalo gOngeleki. Walyewo tuu egongalo lyeni ngele olya za tuu omuntu. Kolumholela meme Kambudu ota wilike oshinima.

# OMUKANKA GWEITAALO

**"The omuyuuki gwandje ota kala e na omwenyo kokwiitaala, nongele ta shuna monima omwenyo gwandje itagu mu hokwa.**

Eitaalo, palongo lyoohapu dhaKalunga, olyo oshinima shoka tashi ningi omuntu kehe omuyuuki koshipala shaKalunga. Itatu vulu nande okuninga aayyuki nomukalo gulwe, eitaalo alike tali tu kwatha moshinima shika. Omukriste e na eitaalo oye wo ta zalekwa uuyuuki, nuuyuuki mboka owo wo tau mu petha omwenyo gwaaluhe puKalunga.

Paverse ndjoka omuntu oku na okwiitaala tango nongele a ningi omwiitaali ota ningi omuyuuki, nongele a ningi omuyuuki Kalunga ote mu taamba nenyanyu momwenyo gwaaluhe. Kalu-oke tu tumine Jesus Kristus a kale omupokati ketu naye, opo tu vule okuhupithwa. Eitaalo tse aakriste tatu pulwa olyokwiitaala muJesus Omuwa gwetu, oshoka kehe ngoka e mu itaala oye ta hupithwa (John 3:16).

Oshitya shika, eitaalo, otashi ti okutaamba edhiladhilo lyontumba pazimino. Omukriste ngele ita kala nokukandeka momwenyo omadhiladhilo gelongo lyafesus ngaashi ge li moohapu dhaKalunga, nena omukriste ngoka oye omwiitaali omulanduli gwaJesus. Pahapu dhaKalunga ota tu pewa edhiladhilo lya shina okuuvako ondu- nge yoshitya shika eitaalo.

MAaheberi 11:1, "Eitaalo olyo einekelo lya kola okwiinekela iitegelelwa nokwiityutha kiinima mbyoka kaayi wetike." Inatu tegelelwa tu zimine owala shoka ohapu yaKalunga tayi tu hololele kombinga yaJesus nelongo lye, ihe otu na okwiinekela wo muJesus ngOmuwa gwetu. Otu na okwiigandjela Jesus komwenyo aguhe. Palundululo limwe oohapu ndhika otadhi fatulwa ngeyi: "Einekelo olyo egwano lyowina miinima mbyoka omuntu a tegamena nokwaa- kala nomalimbililo moshili yaashoka omuntu itoo vulu okumona manga (Hedegard).

Omukriste a taamba Jesus nomwenyo aguhe oha kala a makelithwa uukwagulu nando ta kala muuyuni muka noiha limbililwa nande moonkondo dhOmuwa gwe.

Oohapu dhOsoondaha onti - 21 ya landula uukwatatu, odha kuthwa mu Mat 16:1 - 4. Moteksti ndjika, Jesus ota makelwa kAafarisayi nAsadukayi a ninge endhindhiliko lyomegulu. Oshigwana shaKalunga Israel, osha kala sha igilila aaprofeti. Ngele a holoka, oha pulwa a ninge endhindhiliko lyomegulu, opo a ulUkile aantu kutya eithano lye okwe li pewa kuKalunga naantu opo ihe taa itaale muuyapuki wiilonga ye.

Jesus okwa tindi edhiladhilo lyokuninga endhindhiliko lyomegulu opo aantu ayehe mboka taa itaalithwa kiilonga nokomayakulo ge, ye shi ninge pamukalo ngoka gwa opala, oshoka "aanelago aantu mboka taa itaale nando inaa mona (Joh 20:29)." Eitaalo li ikolelela kokumona tango, Jesus ite li popile. Jesus mokulonga iilonga ye okwa lalakanene aantu ya ndhindhilike kutya oye omutumwa, a tumwa kuKalunga He, onkee okwa tindi wo emakelo ndika opo ki ikuthile esimano lyaHe mokulonga kwe (Joh 10:37).

Eindilo ndika lyaafarisayi nAsadukayi okuninga endhindhiliko lyomegulu, Jesus okwe li tala tali holola uunkundi weitaalo lyawo, oshoka iilonga mbyoka ta longo mokati kawo otayi ho-

lola uunzapo kutya okwa tumwa kuKalunga mokati kawo a longe nokushilipaleka uukwashi- longo shaKalunga maantu ye. Omakwatho e ga ningile aantu, ngele palutu nenge pamwenyo oga kala taga holola kutya oonkondo dhaKalunga otadhi longo muye, ihe oonakumupula endhindhiliko lyomegulu oya hala ye shi itaale ngele a gwanitha elombwelo lyawo.

Oya hala okumona tango opo ya vule okwiitaala. Aantu mbaka ya hala okutaamba Jesus nomukalo nguka, Jesus okwe ya tala ongaantu yaa na uualwa womeitaalo lyashili noya nika omatengauko neshunomonima, onkee okwe ya tala ngepipi ewinayi nolyaahondeli (Jes 57:3 - 4; Hos 2:1 - 2,4). Oya hogolola ondjila ya puka no inaa yi zimininwa omuntu kuKalunga, ondjila yeitaalo li ikolelela kokumona tango.

Oshinima oshikwawo pamwe euvitho lyohapu yaKalunga omolwokuuvithwa kwayo ethimbo ele miigwana yetu lya ningi sha shaa na we omulyo noitaashi dhiladhilwa kaantu nohokwe, molwa-ondjigilile yowala. Aantu yamwe nope- thimbo ndika oya hala okumona tango endhindhiliko lyomegulu, opo anuwa yi inekele oshili yomoohapu dhaKalunga, nongele itashi ningwa, nena otaye dhi tala ngoongano dhowala.

Aantu yamwe otaa nyengwa kokuyelelwa komadhiladhilo goohapu dhaKalunga nokomalandulathano gOngeleki yawo nohaa yamukula ayihe mbika neiteeko lyomushunimonima. Jesus ota pula oshinima oshipu komuntu kehe, nosho eitaalo.

Ombimbeli otayi tu yelithile nawa nkene tu li methimbo ewanawa lyesilohenda, oshoka kehe gumwe i itaale Jesus Kristus, ota pewa uuyuuki mbuka omagano. Uuyuuki owo onkalo yomuntu yaa na oondjo nuulunde washa koshipala shaKalunga.

Uuyuuki owo ngaa uukeenashipo womuntu momohe gaKalunga (Luk 1:6). Oohapu dhaKanga odho tadhi pukulula onkalo ndjoka tu na okukala muuyuni muka, opo tu kale aayogoki naayuuki. Uuyuuki owo ngaa omuzalo ngoka omukriste e na okukala e na, opo Kalunga a vule oku mu taamba nombili (1 Joh 1:5 - 7).

Omuntu omuyuuki oye ta hupithwa esiku Jesus ta galuka a pangule uuyuni. Jesus oku li omukathi gwetu okukondhitha uuwinyi nomiamakelo agehe gomuyuni muka neitaalo muYe otatu li pulwa opo a vule shili oku tu kwatha. Ngoka inaa itaala moonkondo dhaJesus oku mu hupitha mushaashoka, Jesus ite mu hokwa wo oku mu pa ekwatho lyasha.

MOmaevangeli okwe shi holola sho a zi owala paantu inaa hala oku mu itaala inee ya pa ekwatho lyasha. Nosho wo manga inaa gandja ekwatho komuntu okwa konakona tango ngele ekwatho olya tegelelwa tuu nomwenyo gu na eitaalo. Ngele aantu taa ende neitaalo lya kola muJesus otaa ningi aasindani momamakelo agehe gomuyuni muka (1 Joh 5:5), notaa ka adha oshishani shomwenyo gwaaluhe puye megulu.

Moohapu dhoteksti ndjika, Jesus okwa yematekwa kokukwatakata kwaafarisayi naasadukayi sho taa kongo kuyo yene etompelo lyontumba, opo ya vule ye mu itaale. Jesus ita nyanyukilwa okukwatakata hoka, oshoka otaku katekele omuntu eitedhululo, manga ethimbo lyesiloh-

(Heb 10:38)



nda li li po.

Uuna ohapu yaKalunga tayi uvithwa nena omuntu kehe na yamukule mbala, ngele ota ningi gwaKristus nenge aawe. Okuninga etokolo moshinima shika okwa inekelelwa ehalo lya manguluka momwuntu kehe nokwiitedhulula mo muulunde mbala, otashi nyanyukilwa kuKalunga noonkondo (2 Kor 6:1 - 2).

Eitaalo otali pulwa kuJesus li holoke momwenyo gwoye nogwandje. Eitaalo tali pulwa kuJesus oli na okukala nekankameno ewanawa. Nekankameno ndika olyo einekelo lya kola moshili yomauvaneko gevaangeli lye nomoonkondo dhe ngOmukulili nOmuhupithi gwetu.

Pavaangeli lyoshilongo shaKalunga ndyoka Jesus e tu etele muuyuni muka otatu kala twa kola mokutegamena egwanitho lyomauvaneko gaKalunga ngaashi ge li moohapu dhe ondjapuki.

Otatu kala twaa na omalimbililo miinima yohandiyaka yuuyuni mbuka nomiinima mbyoka nayi ka ningwa pehulilo lyomathimbo guuyuni mbuka, oshoka otwa taamba Jesus meitaalo itaa li tenguka we. Ashike shoka hashi nyenge oonkondo noondunge dhomuntu, Kalunga ohe shi pikula, onkee Jesus ta pula tu itaale opo tu sinde ashike medhina lye.

Eitaalo itaa li limbililwa moonkondo dhaJesus notali inekele nombili ashike shoka ta ningile omulanduli gwe. Itali limbililwa noitali tengukithwa konkalo nokiiningwanima yuuyuni mbuka wongashingeyi, ihe olya kola mokwiinekela Jesus ta vulu okugwanithila omwiitaali gwe ompumbwe dhe adhihe. Eitaalo lya tya ngaaka olyo tali tu mwenyeekele uupamwe naJesus momathimbo guudhigu ngombili (Mat. 28:20).

Methimbo lyongashingeyi oitaali yaJesus oya humbata omamakelo gomaudhigu gi ili nogi ili sho uuyuni u li ngashingeyi monkalo yaa na ombili ya gwana. Omamakelo gomaunkundi otaga hepeke aantu. Ondjala otayi hepeke aantu molwoluteni. Omalugodhi nomahomonathano oya etela aantu uungone wolutu momaluhepo gi ili nogi ili.

Ihe nande uuyuni nomalandulathano yi li ngeyi, Jesus ota pula omukriste kehe a kole meitaalo ye kaa limbililwe sha nande, oshoka okwa pewa oonkondo okupangela uuyuni nomathimbo gawo noshowo oombepo adhihe ombwinayi tadhi vundakanitha ombili yaantu muuyuni muka. Okwa pewa oonkondo oku dhi sinda noku dhi mweneke (Efs 1:21 - 22).

Ayehe ya taamba Jesus meitaalo, oyo taa kala muuyuni muka ye na etegameno lya kola nombili ya gwana. Eitaalo lya tya ngaaka olyo ndyoka oteksti ndjika tayi tu hololele Jesus ta tegelele mokukala kwetu ngaalanduli ye. Jesus sho kee li we pamwe noitaali ye muuyuni

Tala kep. 5

# UUNONA POMALAMBO GIYAGAYA YOMAKAKUNYA NKENE TASHI HULITHWA PO, OSHA KUNDATHANWA KAASITA



**Pelambo lyiyagaya popepi nOkakwiyu, konyala naakuluntu, ohaa matukile mpoka okuhadha iilikolomwa yawo. Iimuna nayo wo oyi li mumwe naantu mpoka tayi li oobapila.**

**OSHAATOTWA, Onandjokwe: Aasita yOngeleki yaELCIN pethimbo lyontanda yawo megumbo lyakongindjilakadhona mOshaatotwa, mOnandjokwe, oya kundathana neitulomo shono shi shi okuningwa po, opo uunona owindji moshitopolwa shOwambo mboka wa kalela iilambo yiyagaya yomakakunya, u hulithe po omukalo nguka.**

Oshikundathanwa shono sha li tashi pendutha oluhodhi olunene momutima gwomuvali kehe ta pulakene ehokololo lyaanona moshitopolwa shino, osha li sha zi moshipopwa shi na sha nokukonga omukalo gwokuwilika aanona mego ngalo.

“MOngeleki muno ewiliko mokati kaanona yoskola yOsoondaha nokaanona yepipi lyahamunona hamukuluntu, momagongalo ogendji olya nkundipala, nenge kali po, oshoka oshilonga ihashi futwa,” osho omupopi a ulike shoka she eta oluhepo lwaanashilonga meyakulo ndyoka.

Uunona owindji pethimbo ndika ohau monika wa kalela ondjila yoteya, tau hehela iikulya komaloli gomakakunya ngoka taga matuka kondjila. Otashi etitha ohenda kiikulya mbyoka

tayi toolwa momalambo ya yonuka, nokutya komeho onayi ka vala omavu itaaga wapa okupangwa.

Iitopitha nayo otaku hokololwa tayi toolwa kaanona miyagaya mbyoka, nuunona ohau ke yi topitha pamikalo dhawo, shoka nasho tashi eta iiponga iidhigu.

Oshigongi osha tompelwa kutya okuninga eutho tali keelele uunona okudhana momala-



**Aasita moshigongi shawo mOshatotwa pamwe naawiliki yaakongindjilakadhona**



**Kashi li oshipu okuthaneka aamatyona mbaka. Mpoka ye li omutumba oya hoka omakwena momutunda gwevi ndyoka lya za momalambo, moka hamu ekelwahi iiyagaya. Iikulya yawo opo haye ya ye yi lile mpoka ngaashi ngoka ta thipi mondooha ndjoka yondjema.**

mbo giyagaya yaakwiita, otashi pula elongelokumwe lyaavali ayehe momikunda, naaleli yoshilongo, opo shi adhe ehulilo.

Oshigongi osha pulakene nyenyanyu oonkambadhala ndhoka dha ningwa kaaleli yoshilongo shaMbalantu moshinima shika, mokungambeka ondjila komalambo giyagaya nenge pookamba dhaakwiita. “Mwene gwoshilongo oye mwene kwa li i itula mo, aanona noya kwathwa.” Osho omusita Ndatipo a tumbula netegameno kutya shoka otashi vulu okuningwa wo nokuyalwe.

Ontanda yaasita oya li omagano ga longekidhwa owina kEhangano lyaakongindjilakadhona, 28 - 30.9.1988 nosho sha li oshikando shotango aasita yOngeleki ndjika taye shi ningilwa.

“Inamu tu uva ko twa fa ando twe mu dhina sho twe mu ithana kiinakugwanithwa yeni. Eyakulo lyetu kune montanda ndjika otatu li ningi lya za komwenyo aguhe, nando mu li mone lya fa lyanathangwa,” osho omuwiliki gwoshilonga shuukongindjilakadhona moshitopolwa shika, meme Ester Nashima a kundu aasita mokuthika montanda yawo.

Pehulilo lyontanda omusita kehe a holokele montanda ndjoka, okwa li nondjuulukwe, kutya ando ompito ya tya ngaaka oyi longekidhwe omumvo kehe.

## Sebulon Ekandjo



## Omuyonena gwomaliko otagu tsikile

Omusamane Tomas Simon Nakanyala megongalo Okankolo muuzilo wOndonga, okwa hokololele Omukwetu ta ti oku na iinima yongushu R70.00 ya yiwa nayo komakakunya goKoevoet. Shoka osha ningwa mu Septemba 4, 1988.

Uunona mboka owo auke wa adhikile megumbo, ota ti owa dhengwa, sho itaawu popi Swapo mpoka e li.

Megumbo ekwawo lyomukulukadhi Selma Nashimbanga, ota ku hokololwa mwa kuthwa oondjuhwa ntano komakakunya, esiku tuu ndyoka. Ehokololo olya kolekwa kaakali yomomukunda ngoka.

### Epukululo:

Aasimanekwa, moshifo shOmukwetu sha Juni 30, 1988 ep. 12 pomatseyitho gomaso, mono mwa li eso lya kuku Selma Niiye Amushila mOshigambo, ngono a tumbulwa noomvula (71) nokwa mana oondjenda momasiku 19.5.1988, osha puka

Sho shili mondjila: kuku Selma Niiye Amushila okwa li mOnekaku mOshigambo. Okwa walwa (1912) nokwa hulitha oondjenda mesiku 18.5.1988. Okwa thigi ko oyana yatatu, aatekulu 18 naatekulululwa 3. Eimbilo 400 Eps 33:18 - 22

Hilma Fillemon  
Iikokola - Elombe

## OTWA KONEKAFANA: HASHEELA

Omafiku atatu ovawiliki voikondolonga mOngeleki ya ELCIN va kala moshongalele shavo, ova ka dimbuka va koneka nomesho mape oshinakuwanifwa ve shi kwete mboli shinene mOngeleki yavo nomoshiwana, oku i tunga. Ova koneka yo keshe omukwao osho ha longo mOngeleki. "Otwa konekafana paife," osho Hamushanga wOngeleki, omufita Absalom Hasheela a hepaulula.

Oshongalele shovanailonga mOngeleki ei, osha li ko 6-9.10.1988 mOngwediva palongekido lombelewa yeputado lopakriste. "Inatu uya po okupwilikina koipopiwa ya ngongwa nawa, ndelenee okulitwa omukumo, okulindungika fye tu kongeni omikalo nomifinda dipe nhumbi hatu nghonopaleke eyakulo letu mu ELCIN," meme Hilma Mp. Pauly Tshilongo, osho a fatululila oshongalele metameko lasho.

Mekundo laye okwa ulika nhumbi ovawiliki kave shi ovanhu vanene ve dule ovayakulwa. "Elalakano letu oli na okukala eyakulafano," osho a dimbulukifa ovapwilikini. Okwa ti yo eyakulafano liwa ngeenge ola kana po, ovanashilonga navo otava kanifa ouumbo mOngeleki yavo.

Ovawiliki konyala omulongo vomoikondo 13 yOngeleki, ova holokele moshongalele shavo. Keshe umwe okwa yandja efano loukwatya woshilonga osho ha longo nomutungilo washo. Oshongalele osha dimbulukwa omhumbwe inene yokushiiwa osho tashi ningwa moshikondo keshe, osho sha talwa kutya osho ashike tashi kwafa okuuda ko uukwangeleki aushe.

Oshongalele osha dimbulukwa yo omhumbwe yokulonga oilonga yOngeleki pamufango womafaneko a tungwa, osho yo eshiivo la wana

### Omukanka gweitaalo

Dha za kep. 3

mbuka opu na Ombepo Ondjapuki ngoka ta wilike okweenda kwetu kwopambepo ta koleke eitaalo lyetu. Ote tu pukulula note tu popile kuuwinayi auhe.

Ombepo Ondjapuki otayi tu kwatha tu kole mokwiinekela moshili yohapu dhaKalunga nomauvaneko gadho note tu koleke twaa vulwe notwaa tenguke mokutegelela egwanitho lyashihe ngele Jesus ta galuka. Jesus Kristus omanga tu li iilyo mOngerki Ye, oye na kale Omuwa gwetu, e na omwenyo nota kala aluhe sigo aluhe ngoka Kalunga oye awike e tu pe tu mu inekelele okukalamwenyo kwetu muuyuni mbuka nomuuyuni tau ya meitaalo (Iil 2:36).


E. Niinkoti  
Nakayale

### Ethaneko lyegaluko lyAanamibia

Dha za kep. 1

UUPALE WOONDHILA: *Ovenduka, Ondangwa nOshaanda (Grootfontein)*

Otaku tengenekwa esiku kehe otaku vulu okuheluka aantu 400 sigo 500 niihauto osho wo



Oshigongi shaawiliki yiikondo miipundi. A thikama komeho, Amushanga gwomayelithilo mOngeleki, omusamane John Shitundeni

movawiliki opo va dule okutukulila ovawilikwa vavo oilonga.

Mwaashi oshongalele osha punikwa neenghono kefatululo la yandjwa kovatumwa vOngeleki yetu; meme Aletta Ngaikukwete natate A. Hasheela, ovo opo va alukile koshoongalele shepukululo moinima yewiliko loilonga i lili nai lili mOngeleki, kuZimbambwe.

Oshongalele osha li sha twa kumwe, ku ningwe omapukululo meni lOngeleki e na sha nouteku wewiliko nowelelo moinima yOngeleki. Ekwafo moshinima eshi, okwa talika oshiwa yo ngeenge tali indilwa pondje, ngaashi olo la ningile okersesa moZimbambwe.

Opwa kundafanwa yo omalunduluko opapolotika oo a taalela oshilongo eshi, osho yo onghalo

yomeni loshilongo, unene kombinga yeefikola noyounona veefikola. Moshongalele omwa dja efatululo la tumwa koifo, nghene oshongalele tashi tale Ongeleki moshiwana eshi ya teelwa i shi ninge kombinga yomakuyunguto meefikola nokouteku wounona moshiwana. Efatululo eli, tala moshifo eshi.

"Omesho etu okwa pashulwa, otu wete oinima yOngeleki yetu paife, oyo twa kala twa fa ihatu i mono shito. Ashike mokushuna koilonga, ohatu pumbwa natango eitavelo lokufikamena po osho tu shi shii notwe shi lihonga, ngaashi omudalwa winya omupofi eshi a twikululwa nokwa ya moihokolola yovakulunhu voshiwana shaye," omufita Julius Mtuleni osho kwa li a popifa oshongalele medimbuko lasho mOuvalelo Uyapuki.

Sebulon Ekandjo



Oombelewa dhaawilikingeleki muAfrika, esiku kehe odhu udha iinakugwanithwa. Osho sha konekwa ngashingeyi. Methano ndika oshinyandwa otashi ulike iilonga yesiku yomuwilikingeleki Omuyafrika. Ayehe yatano mboka ya thikama mwa kwatelelwa Amushanga gwe (pokatilela kethano), oye ya komelewa kehe gumwe ti indile a ningilwe sha. E li omutumba pokati kethano, omuwilikingeleki (andola) a limbililwa. Esiku otali ipitile po inapu ningwa sha.

nondhila. Kumboka taa kongo aantu yawo mpoka ya helukila nkene ye na okukwathwa, inashi tseyika manga.

Oraata yOngeleki muNamibia (CCN), oya hogolola okomisi yowina okulongekidha

omahala, iikulya, aayakuli ngaashi aasita, aahingi, aatoloki, iiyenditho noompumbwe oonkwawo. "Omalongekidho omanene otaga pumbiwa noga tokelwa nokuli," osho omumbisofi Dumeni a hokolola. Okwa kumagidha oshigwana shi ilongekidhile etaambo ndyoka.

# ETSAKANENO LYANUJOMA MOLUSAKA

Ewiliko lyaSWAPO kombanda olye shi pondola okuhiya aawiliki yi ili noyi ili muNamibia, nokuninga oshigongi hwiya muKabwe, popepi naLusaka muZambia. Oshigongi osha li shomasiku gaali 9 - 10.10.1988 nopahokololo

Osho oshigongi shotango koludhi lwasho sha ningwa pokati kAanamibia yomaithano gi ili nogi ili, okukundathana onakuyiwa yoshilongo nkene iita ya tamekele mpaka konima yomimvo 22. "Omuntu oto vulu okutya osha li oshigongi shokutaambathana noshokupaathana omauye-lele komapulo omadhigu moyendji, omolwelu-

Omolwashike hatu ipula nomayooloko goma-lwaala goshipa, tse tatu dhimbwa efaathano lyombinzi yetu? Omolwashike tatu kudhilwa komayooloko gomithigululwakalo, tse tatu dhi-mbweni uugumwe weitaalo mboka twa shashe-lwa muwo? Otekisti kotundimbimbeli ndjoka oya li ya kuthwa mu Rom.12:4-6.

Okwa gwedha ko, kutya iinima mbyoka tayi tu ningi tu kale twa fa twa yooloka, oyo iikengelela notayi nenepekwa owala kaantu, ihe mbyoka tayi tu manga kumwe oyo yolela noya shitwa kuKalunga. Omumbisofi okwa kumagidha oshigongi shaa topole shono Kalunga e shi tula kumwe. Mat.19:6b.

## Etulomiilonga lyokatokolwa 435

Aawiliki yaSWAPO meni lyoshilongo nayo oya hiyilwe koshigongi shoka. Omusita Zepanja Kameeta naAmushanga gwaagundjuka

## Tala kepanja tali landula

## Natango 20 ve ke lihonga muAmerika

Ombelewa younafikola muELCIN, oya koleka nokutya ovanafikola 10 ova fiya po nale Namibia va ka twikile nelihongo lavo muAmerika paprograma oyo ya tameke-lwe 1986. Ongeleki onghwaevaengeli paLuther muAmerika oya yandja omhito kEengeleki eenghwaLuther muNamibia, di va tumine ovahongwa okulihonga mEe-kolidji nomeeuniveesti davo kwinya.

Ovahongwa voneudo ova shikula vakwao 20, va ile 1987 na 10 va ile 1986. Paife Eengeleki domuNamibia eenghwaLuther, odi na ovahongwa 30 muAmerika paprograma ei.

## EFATULULO PAFUPI LYIILONGA YA FELM

Omuyakulingeleki meme Ulla Nenonen, Amushangakwatakanithi pokati kOngeleki ne-hanganotumo lyaSoomi (FELM), okwa li gumwe gwaamboka ya holokele ethimbo efupi moshigongi shaawiliki yiikandjo mOngwedi-va. Meme Nenonen opo a thiki omwedhi nguka mOwambo, okuza kuSoomi hoka a ka fudhile po oomwedhi hamano omoluunkundi wopalutu kwa li u mu na.

Naye wo mokufatulula iilonga yEhanganotumo mOngeleki yawo, okwa ti; Ehanganotumo ndyoka olya totelwe 1859 nelalakano okufala evaangeli kumboka kaye li na, opo omuntu aguhe a yakulwe. Osho hashi li tungitha iipa-ngelo noosikola. Okwa gwedha ko, kutya nga-shingeyi Ehanganoto otali longo miilongo 17 ya-Afrika naAsia nomiilongo iyali yaEuropa. Ina tumbula omadhina gayo.

Okwa gwedha ko, kutya omutumwa e na okwoopalela tango okutumwa. Ngoka a kala shito omunashilonga gwOngeleki. E ta kala oomvula ngele oonshona omulongo mepyatumo moka ta ka longa nokwiilonga elaka lyaavale-lwa mo moka ta longo.

## Tala kepanja tali landula



Methano ndika yamwe yomaakolekwa taa imbi ya thikama komeho goaltali. Konima yawo otaku monika omusita Löwe gwOngeleki onkwaLuther yAandowishi

lyomumbisofi Kleopas Dumeni gumwe gwaawilikingeleki mboka ya yile ko, osha kundathana unene omukalo gweilongeki-dhilo lyemanguluko lyaNamibia nokupaa-thana omauye-lele komapulo ge na sha nelunduluko lyopapolitika moshilongo.

Osheendo shaantu 190, shono sha endithwa nondhila yowina yaZambia, okuza mokapale kaVenduka, osha li sha thikama maawilikinge-leki, maawiliki yoongundu dhopapolitika aaluudhe naatiligane, maanangeshefa, maalongi yoosikola dhokombanda, oondohotola, aakalelipo yoongundu dhaakiintu moshilongo, aakalelipo yomahangano gaanasikola nogaani-longa, aakwaniilwa nomalenga gomomihoko konyala adhihe muNamibia.

nduluko lyethimbo," osho omumbisofi Dume-ni e shi fatulula mokugaluka kwe.

Oshigongi osha li tashi tula omuthindo kompu-mbwe yuukumwe moshigwana shaNamibia, oshinima shokukongwa nokulalakanenwa pethimbo ndika nokwaa na okutala tango olwaala, eitaalo lyomuntu nenge oludhi lwe.

Motundimbimbeli ndjoka omumbisofi e yi ningile oshigongi shoka, okwa ti:



Aagundjuka 10 Aanamibia muupongekwa, oya dhana oshituthi shawo shokukolekwa meitaalo 2.10.1988, muHarare, Zimbabwe. Omusitalongwa Theofilus Amwaama okwa li gumwe gwomaayakuli moshituthi shoka.

# NAAWILIKI YOMENI LYOSHILONGO

moSWAPO, omusamane Jerry Ekanjo, oyo ayeke ya li inaa pewa eziminino kepangelo ndika okuya ko. Oshigongi osha wilikwa kongunduwiliki yaSWAPO mewiliko lyomupresidende Sam Nuujoma.

Iilyo yoshigongi oya li ya kundane kwa kombinga yoonkundathana dhemanguluko lyaNamibia mpoka dha thikama pethimbo ndyoka. Pafatululo lyaAmushanga gwomayelithilo moSWAPO, omusamane Hidipo Hamutenja, esiku lyaNovomba 1, 1988 olyo lya talwa sigo ompoka, li ninge etameko lyokutulitha mii- longa ontokolwa 435 yligwanahangano.

Ompito ndjoka tayi vulu okuningwa po ethimbo kehe, omusamane Amutenja, okwe yi fatulula, kutya okuundulila esiku ndyoka komeho ngele nani opwa talwa tango kutya inapu ilongekidhwa sha gwana okutameka iilonga mesiku ndyoka.

Okwa gwedha ko, kutya ngele esiku ndyoka olyo lya ningi etameko lyelongekidho lyehogololo, nena etanga lyombili lya UN, otali tegelelwa li thike muNamibia muNovomba 8, 1988. Yo Aanamibia muupongekwa taa tameke okugalukila koshilongo petameko lyaDese- mba, osho ehokololo lya ti.

Ewiliko lyaSWAPO pondje, otali indile oshigwana ashihe shi longekidhe okutaamba aantu mboka ya kala oomvula odhindji pondje yoshilongo. Pafatululo lyomumbisofi lya kankamekwa kuuyelele mboka a zi nawo pondje yoshilongo oshinima otashi ka kala enyanyu pamwe noluhodhi okutaamba aantu yetu.

Okwa ti enyanyu omolwashoka tatu monathana naamboka twa topoka nalenale nayo, ihe oluhodhi wo sho tapu ka dhimbululwa oonima noongandi nani kaye ko we. Naamboka taa galuka osho taye tu adha monkalo ya fa ndjoka, ashike omuntu ou na oku shi taambako shi li ngaashi shi li, osho omumbisofi a gandja omukumo okutaamba ko ethimbo ndyoka.



Amushangakwatakanithi, meme U. Nenonen



**Yamwe yomaakolekwa mbaka oya li inaa thika pethimbo, oya yakulwa komulongwasita Th. Amwaama ngaashi ta monika methano ndika. Kolulyo, ogumwe gwomaalongi yaasita mouniveesti yaZimbabwe, a tegelela Amwaama a mane ekoleko, opo ya tsikile noshituthi shuulalelo uuyapuki.**

## Omavi gokuumbangalantu waEuropa tagi ilongekidhile endepule po lyoshigwana shaNamibia

**Oministeli dhiinima yopondje nodhomalongelokumwe nomahumithokomeho dhomiilongo yuumbangalantu waEuropa, omasiku ngaka odha hulitha oshigongi shadho muKiirunan, shomuSoomi, moka dha hogolola okangundulungekidhi koo- mpito dhomalongelokumwe gomapendu- lepo muNamibia ndyoka tashi vulika tali manguluka mbala.**

Soomi oye ta kwatele komeho omailongekidho ngaka. Omavi agehe ngoka gokuumbangalantu oge na ehalo enene okukutha muukumwe wago Namibia li kale monomola yotango, oshilongo oshipendulwa po kugo, ngele lya manguluka.

Oministeli yiinima yopondje yaSoomi, omusa- mane Kalevi Sorsa, ota tala neinekelo lyoonku- ndathana dhopambili ndhoka tadhi ningwa omasiku ngaka. "Pomathimbo ngaka gahuguni- na, naamboka wo ya li momalimbililo, oye li po ngashingeyi mokulunduluka yu ikithe omatega- meno gawo mokuzimina iinima," osho omusa- mane Sorsa a popi omasiku ngaka pashifonku- ndana "Oonkundana dhaHelsinki."

Soomi nalyo olyu uvaneke okutuma koNami- bia aakwiita konyala 700 metanga lyombili lya VVO, ethimbo lyomumvo gumwe. Aatumwa yetu, oye li pokumona ongundu tayi zi kegu- mbo, shoka ngele osha piti.


## EFATULULO LYIILONGA YA FELM

Dha zi kep. 6

Palwe muuyuni, omulongi Nenonen paithano lye, okwa ti eilongo lyelaka lyaavalelwa mo oha- shi ya pula oomvula mbali, manga elaka lyOshi- wambo hali ya pula owala oomwedhi ndatu. MOngeleki yi ithikamena ngaashi ELCIN, okwa ti aatumwa ohaa ithanwa kOngeleki yoyene, notaa longo kohi yomautho gOngeleki ndjoka. "Mpaka otu li aanashilonga ya ELCIN, twa hiywa kElelongeleki," osho a fatulula omolwashike ye li mpaka.

Ehanganotumo ndika olya tamekele muNa- mibia, kOwambo 1870. Ongeleki ndjoka ya valwa mo oya tameke okwiithikamena 1957. Nonando aatumwa ngashingeyi ohaa ithanwa kElelongeleki, oondjambi dhawo ohadhi futwa kEhanganotumo, nomakwatho galwe gOnge- leki gopaimaliwa.

Sebulon Ekanjo



Omuwilikitumi mEhanganotumo lyaSoomi, dr Henrik Smedjebäckä ngoka kwa li a talele po Ongeleki yetu numvo petameko.

# Soomi okwi ilongekidha okukwatha mependulopo lyaNamibia lya manguluka

Osho shi li medhiladhilo lyepangelo lyaSoomi, kutya uuna Namibia lya manguluka, epangelo lyawo otali ka dhika mbala omakwatathano gopaudi diploma nepangelo epe lyoshilongo shika nokutameka wo nomakwatho gokutungu emanguluko lyoshilongo. Osha popiwa komukwanepangelo lyaSoomi, omusamane Hannu Mäntyvaara, pethimbo lyetalelopo lye lyomasiku gane mOwambo.

Omusamane Mäntyvaara moonkundathana dhe nOmukwetu, okwa ulike koshinakugwanithwa



Omusamane Hannu Mäntivaara pethimbo lyetalelopo lye mOwambo.

epangelo lye li shi na nale koshigwana shaNamibia nokomeho uuna evi lya manguluka. Okwa ti, uuna oshitololitho 435, tashi tulwa milonga, epangelo lye oli ilongekidha okugandja aakwiita 600 ketanga lyombili lya UNO, ndyoka lya tegelelwa muNamibia.

Okwa gwedha ko a ti, shoka etsikilo ashike lyaashono oshilongo shawo sha kala tashi kwatha Namibia, ngaashi moprograma yEhangano lyomakwatho kuuyuni lyaSoomi (Finnish Aid) ndyoka hali longitha Aanamibia pondje yoshilongo. Aatumwa mboka ya kala taa longo mpaka muNamibia, nasho omusamane Mäntyvaara okwe shi yalulile mushono Soomi ha ningile Namibia.

Omyenda nguka gwepangelo lyaSoomi okwa talele po Owambo 30.9-5.10.1988 pamwe neefolo lye Sirkku. Oya talele po omahala gamwe ga simana mOngeleki unene ngoka ge na sha nondjokonona yoshilonga shetumo shono sha longwa kAasoomi mevi ndika; ngaashi Omulonga, Okangili, Olukonda, Oshigambo noNgwediva.

Okwa tsakanene wo nomumbisofi gwOngeleki, K. Dumeni niilyo yimwe yopombelewa. Okwa monathana wo naayakulingeleki Aasoomi mboka ye li natango meyakulo mpaka, osho wo a ningi etalelepo lyopaukuume kuuwa womukwaniilwa gwoshilongo shaNdonga, Immanuel Elifas.

“Epangelo lyetu inali talela po nale Namibia pamulandu gwiilongo yuumbangalantu waEuropa sho yaa na elongelokumwe na SA,

ihe pethimbo ndika lyomalunduluko taga ka ningwa muupolotika, otwa tala oshivanawa ngashingeyi tu tsakanene naantu yomoshitopolwa shika, tu uve omadhiladhilo gawo omolwonakuyiwa yevi ndika,” osho a fatulula elalakano lyetalelopo lyawo, kuNamibia.

Pamwe nomukulukadhi gwe, oya pandula ketaambo ewanawa ye li ningilwa kOngeleki muNamibia. “Osha yela, osha zi muukuume wethimbo lyomimvo dhi vule 100 mboka Aawambo nAasoomi ye u na,” osho a tumbula nepandulo. Okwa uvaneke kutya Namibia otaye ke li kwatha momapendulopo goshilongo, naanaa ngaashi epangelo lye hali shi ningile Zambia naTanzania.

Sebulon Ekandjo

## “Iinima ohii popiwa ngaa!”

Shilombwelwa iinima ohii popiwa ngaa, mwa zile osheendo oshinene muka shaawiliki yOongeleki, aawiliki yoopaati dhopapolotika naakwaniilwa yiilongo, ya ya koLusaka, oshilongopangelo shaZambia. Osheendo shoka oshinene osha thikama pokapale koondhila kaVenduka 8.10.1988 nodhila yowina yepangelo lyaZambia nenge oyalye walye, omuntu ku shiwo.

Ongundu ndjoka oya hiyilwe kaawiliki yongundu ya SWAPO, nelalakano ndyoka Omukwetu inaa mona natango uuyeleele muyo, kutya olini. Shono sha simana twa hala okuulika mokakololo haka ngaashi hatu shi ningi shito, osho shoka, kutya evi ngele tali manguluka, ohashi tula aantu momalongekidho omanene.

Oshinima oludhilu, u ze mongandahulu u ka tunge egumbo epe. Kehe omukwashi-gwana oku na oshinakugwanithwa shokulongekidha onakuyiwa yemanguluka lyoshilongo shino miinima mbyoka tayi ka tunga oshigwana. Oshivanawa ngele kehe gumwe ti igandja okuyakula nenge okuyakulithwa mpoka ti indilwa e shi ninge, ope emanguluko li ende nombili.

Ou shi shi tuu? Muukoloni ohatu ipula ngeyi tatu ti: Mbela epangelo otali ningile ndje shike? Manga memanguluko epulo ndyoka ohatu li tanauna tu tye: Oshike ndi na okuningila epangelo lyandje? Sho shono itashi ti ando kutya epangelo lyoshilongo sha manguluka kali na oshinaku-gwanithwa kaantu yalyo, aawe. Oli shi na, oshinene nokuli shi vule shepangelo lyo-

paukoloni.

Okuza Novomba lyotango, shimpa tuu etanga lyombili lya UNO lya thiki mpaka, oyendji otaa ka pumbiwa okulonga pamwe nongundu ndjoka. Ndishi yo aayenda moshilongo, momudhingoloko, melaka, moohedhi dhoshigwana nomomatseho? Iilonga yawo otaye ke yi longa ashike nawa ngele otatu ya kwatha mpaka sha pumbiwa. Eyakulo lyoye mushika olyo etungo enene memanguluko.

NDINDHILIKA: Emanguluko lyevi, oshinima shi na aatondi noihashi nyanyudha omuntu kehe. Aatondi yalyo ohaa kambadhala nomukalo kehe opo li popye, manga mboka mwe li eta po, mu li hole, oshoka olya pula nokuli ombinzi yeni, hamu li gamenene po nomukalo kehe hagu vulika. Omolwaashoka omatumbulo taga uvika momakana gaaholimbili yemanguluko lyevi ndika pethimbo ndika okutya ashike: Kaleni mwa kotoka. Ihali kalwa nalyo komuntu takotha.

Sebulon Ekandjo

## Elongitho lyiikolitha moosa

Koshigwana oshiholike shaNamibia, kwathii ndje ndi popye sha kumboka haa longekidhile oonakuthigwa po iikolitha. Elalakano lyokugandja iikolitha koonakuthigwa po, ngiika okwa dhiladhilwa chekeleko. Shika kashi shi shoshili.



Iikolitha muyo yene kayi shi oshinima sho opala, ohayi piyaganeke nokushundula omuntu. Otandi indile tu lundululeni okulongitha iikolitha pamukalo nguka. Jakob ote shi popi sha yela, kutya elongelokalunga lya yela nolyaa na oshidhe koshipala shaKalunga okupendulila po nokuhekeleka oonakuthigwa po, oku ya tsa omukumo nokukoleka eitaalo lyawo. Jak.1:27 Otu na iiyakulitho oyindji yopalutu tatu vulu okukwatha nayo oonakuthigwa po methimbo lyoluhodhi lwawo.

Adries Ausiku  
Aradis

## Yaali ya sile metopo lyoboma

Omukulukadhi nokamwana oya sile ombadhilila moshiponga shoboma yopeke, moka ekakunya Jason Nangongola, taku tiwa olye ehamekelwa mo kashona. Oshiponga osha holoka momudhingoloko gwaNdangwa 13.10.1988 potundi ontihamano yongula. Oonakusa oyo Marta Shambo (28) noka-nkelo ke Marta. Nakusa omulongi moshikondo shelongo mOndangwa. Okwa thigi ko okanona kamwe Andreas.

## EOPALEKO

Moshifo No. 19/88 mepandja etiyali, mokapalanyolo: *Elangeko lyaadiakoni*, omwa dhimbiwa edhina Festus Mvula, Omuntele, manga Immanuel Mateus ngoka a tiwa okwa langekwa kOmuntele, oshi na okukala kOshaango. Ombili. mushika.

Amushanga gwOmukwetu

## Otwa shitiwa oilonga

Otu na omushiti umwe aeke  
Molwaye aeke twa holoka po atushe  
E tu shita nelitulemo laye alishe  
Oshilonga shinene sha longwa mouwike  
Ndele osha longwa sha longwekeka

Pashito otwa shitwa twa shitika  
Pamufefifo otwa shitwa twa faafana  
Nande pamufika otu dulafane shili  
Nomolulava otwa yooloka lela  
Atushe oshifefa shaKallunga ku he na vali

Okwe tu shita twa shitika  
E tu ma twa mewekeka  
E tu longwa twa longwekeka  
Omufudo womwenyo e tu fudila  
Opo tu ninge oovanamwenyo yaye

Okwe tu wapeka tu mu wapalele  
E tu faafanifa tu kale oshifefa shaye  
Okwe tu longwa tu mu longwele  
E tu tula omwenyo tu mu mwenyeni  
Noilonga yetu iwa tai pandula eshito

Inatu yoololwa pamufika tu liyoolole  
Ndele tu yoolole chalo laye oilipi po  
Inatu tongolwa komalulava tu litongole  
Ndele tu tongole ouwa kumwe nowii  
Tu tambulafane ngaashi Kristus e tu tmbula  
Okwe tu pa oilonga tu i longwe  
Noidjemo yoiloonga yetu a teelela  
I haffa ngeno, kai nyematifa  
I wanifwe noilongwe pauyuki  
Osheshi Omwene oye omuyuki

Elondwelo li yela nola twa otwa pewa  
Eshihivifo le tu yuka otwa shivifilwa  
"Oto longwe noshinhwi moshipala" osha yela  
Kokaana, komunyasha, komukulunhu oshi uditike  
Elombwelo inali futama ola fatuluka

# EVALO LYANAMIBIA OTALI HINDWA KOMAUPYAKADHI: CHILSTROM

**"Nonando oshigwana ashihe sha yuulukwa evalo lyoshigwana shalyo, oku na natango iikitakani oyindji mbyoka tayi hindi evalo li ningwe pamukalo," osho omubisofi omukuluntu gwOngeleki onkwa-Luther muAmerica, Herbert Chilstrom a tumbula konima yetalelopo lye muNamibia.**

Omuwilikingeleki gwiilyo yomagongalo yi vule oomiliyona ntano, Chilstrom, okwa talela po konyala uule woshiwike shimwe mevi ndika, pehulilo lyomwedhi gwa yi. Pamwe nosheendo she shaantu yatano mwa kwatelwa omukulukadhi gwe omusita Corinne, okwa talele po Ongeleki yaELCIN, yaELC noyAandowishi; Ongeleki onkwaLuther moshilongo.

Noinaa tumbula iikitakani mbyoka yi li mondjila yoshitheta shevalo lyevi ndika, omubisofi metumwalaka lye kiifo okwa ti: Kehe gumwe nda popi naye, Omuluudhe nenge Omutiligane, omuyamba nenge omuthigona, mUushimba nenge koongamba dhoshilongo ayehe oya yuulukwa evalo lyokanona pamukalo gwombili. Ashike opo na emakelo lyuumbanda tali hindi okanona ka valwe muukolele, osho a ti.


Oshikalimo shetumwalaka lye ashihe oshi li ngaashi tashi landula:

Peha lyosheendo shono sha zile kOngeleki onkwaLuther muAmerica (ELCA), nandi tameke nokuholola epandulo kumboka ya ningitha etalelopo lyetu muNamibia li kale li na ondjambi. Omasiku 10 twa kala muka, ogu udhithwa kohenda yokwiilonga oowino dhoku tu kwatha tu tale evi, aantu nOngeleki kekwa tho lyaambo-

ka ye shi mo moshilongo. Otwa ningilwa nawa notwe shi pandula.

Paungame mwene ando ndi ile nomukiuntu ngoka ta vulu okuvala. Ayehe mboka nda popi nayo, Aaluudhe naatiligane, aayamba naathigona, mUushimba nokuumbugantu woshilongo, oya yuulukwa owala evalo lyokaana ke na uukolele pamukalo gwombili. Ayehe oya hala oshigwana shi valwe noshi kale shi na omwenyo.

Ashike oku na omatompele gamwe gu uvitike. Etegamenno oli li memakelo lyuumbanda. Oshigwana shika osha li pokuvalwa ihe inapu ya sha.



**Omubisofi Albert Chilstrom**

## To hiywa komusika kOngwediva

**Osikola yomusiki muELCIN otayi taamba aalongwa yomusiki 1989. Ngoka wa hala mosikola ndjoka, tuma eindilo lyoye manga Novomba 1988, inaagu sa kondjukithi yi li pevi. Omwiindili na kale e na:**

—Ehalo okwiilonga noku ka longwa megongalo lyawo nenge mosikola yawo.  
—Na kale ha uvu ko Oshiingilisa.

**Osikola oyomumvo gumwe. Okutseye okulesha oonote nokuhika uuhumba okwo iilongwa ya simana mosikola ndjoka.**

**Tuma ano eindilo ku:  
Ombelewamusiki  
P/Bag X5505  
Oshakati  
9000**

Otwa shitwa tu shite yo  
Twa etwa po tu ete po  
Twa mewa tu meye yo sha  
Twa longwa opo tu longwe  
Okushita hakufudila mo omwenyo  
Oshilonga keshe shiwa to shi longo oto shiti

Koneka ove u didilike  
Moilonga yoye ou wetike  
Ongajeremia owa hoololwa  
Manga ino shitwa owa shivika  
Nofimbo ino dalwa owa diladilwa  
Oshilonga oshilipi po u na oku shi pewa  
Pandjele yeenghono yo odo ove to pewa

Kotoka u ha kotokelwe komutondi  
Lungama u ha dine oshilonga shoye  
Koneka, omutondi oha koneke diva  
Ovananyalo noupu ohe va shiiva mo  
Ovandedenhu divadiva ta tofa mo  
E va likole va ninge oshihakanwa shaye

Moilonga yoye dimbulukwa  
U he tinge, ndele tangwa  
Ino lipanda ndele pandulwa  
U he lifimaneke ndele teelela  
U fimanekifwe koolonga yoye iwa  
Efimano loo li pewe nakufimana

Ailly Ndimelao Tuyoleni

Oku na natango iikitakani oyindji mbyoka tayi hindi evalo pamukalo gwa yela. Nonando ayihe tayi ende nawa, nonando emanguluko tali ya nemanguluko tali valwa, onkee ngaa natango ku na omahindo ogendji niikitakani mbyoka ya taalela epangelo epe.

Pamatompelo ngaka, otatu indile iilyo yOngeleki yetu yi mu galikanene noyi mu yambidhidhe. Ekwatathano lyetu nOngeleki onkwaLuther muNamibia olya zi nale noli na iiyimati. Nomwaalu gwAakwaluther ye thike mpoka mevi ndika ye li konyala ctata lyoshigwana ashihe, tse otu uvite uugumwe nane.


Otatu igidha pamwe nane okatokolitho 435 kii-gwanahangano ka tulwe miilonga. Ngaashi tu li aakwanegongalo yaAmerica, otu shi shi kutya oshilongo shetu osha li shimwe shomiilongo mbyoka ya tungu ethaneko ndyoka.

Ihe osha kala she tu yemateka, oshoka aawiliki yetu yopapolitika omimvo ndhika, inaa kala we taa gandja eyambidhidho lyawo lya gwana kulyo.

Mesiku ndika (29.9.1988) lyedhimbulukwo lyomvula 10, oshitokolitho sha totwa, otatu ulumike oopaati, mwa kwatelwa unene epangelo lyetu lyaAmerica li tongolole po nawa petulomiilonga lyoshitokolitho.

Nongele ihe oshigwana oshipe sha valwa, otatu ka ulumika aawiliki yaAmerica ya gandje eyambidhidho lya kola komahupilo goshigwana oshipe, opo shono sha valwa shi tsikilwe muukolele. Otatu shuna kuAmerica tu shi shi kutya, muNamibia oongendo otadhi lili potundi 11h00 nopotundi 16h00 komatango. Nopethimbo ndyoka otatu mwena manga, tu kale noka-thimbo kegalikano pamwe nane.

**Lya shainwa kobisofi H.Chilstrom  
mOvenduka esiku 29.9.1988**



# Ova shangela nge tava ti.....

## Elombwelo kuvakwetu ava hamu nyola omolwa SA

Ame omuleshi woshifo shOmukwetu, luhapu ohandi shakeneke mo oipopiwa i na sha naSA ile nomakakunya. Kandi shi naana ngeenge otashi kwafa sha okushada nee vati SA moshifo shOmukwetu ye PW.Botha ihaa lesa oshifo eshi. Ile pamwe ope na ou ha ke mu lombwela osho mwa popya? Ote mu udifa ko ngoo shili?

Vakwetu, ngeno mu nyolele koNAMIBIAN, NEW NATION nokoifo ikwao i he shi Omukwetu. Ondi wete ashike tamu manepo eenhele dokutula oipopiwa ei i na oshilonga. Vakwetu otamu lihepeke ashike, edu loovene osha yela nale kutya itali mangululifwa koipopiwa yeni.

Efeni ovanhu ava tava kondjele edu va kondje. Okupopya emanepo ashike lefimbo. Ove kondjela ashike oukriste woye, oita oya shitwa kuKalunga ye mwene, Yee oye te i lotifa efimbo laye ngeenge la fiki.

## Victory Edward Oshakati

## Swapo oye oshigwana

Owindji omakutsi gandje oga kudhilwa komipopyo dhaatsindumbo nehanganano ekondjelimanguluko lyaNamibia, kutya Swapo ota hepeke, ota dhipaga nota hanagula po oosikola mOwambo.

Ngame Omunamibia omupopi gwelaka lyOshiwambo ihe sigo onena inandi uva noinandi mona oshilyo shoPLAN sha teya po etungo lyoskola nenge ongeleka.

Iilonga ya tya ngaaka yuupwidhi oya longwa ketanga edhipagi ekolonyeki lya S.A pamwe nomalandwambongo. Swapo ota kondjele uuthe-mba womuntu kehe, ehanganano ehilimbili, olunzo lwelandulathano lyashili moNamibia. oPLAN

oyo ombui, uukumwe, elandulathano nomatokolo taga tungu. Nahuginina Swapo oye aantu naantu oyo Swapo.

Onkee ne mboka mu li iilandomwa yoombulu, kambadhaleni opo mwaa pukithe oshigwana oshiholike nomahapu geni. Inamu lundila Swapo ngele tamu longo iilonga yeni yokwaa na hole noshigwana!

## Levi T.T.Tshilongo Oloole

## Eyamukulo kuKukantalelo moshifo sheti 30.11.87 shonomola 22 pepandja 11

Omusamane Kantalelo, ngoye mwene andola ou li tuu mondjila nomungoye tatu vulu tu talele ngaashi edhina lyoye tali ti, sho wa pula ngele oshi li tuu mondjila okuhunga mukweni paRadio. Ihe ngame onda ndhindhilike kutya ino pula wa hala okuuva shoka Ombimbeli tayi ti, shila owa hala okuuva nokutseya ngele oshoopala tuu okugalikanena omuntu paRadio.

Onkene kepulo lyoye nandi ku yamukule kutya eeno, oshi li mondjila molwaashono:

Aawambo oye na eyeletumbulo hali ti: "Edhina lyombwa okumukweni ho li uvu." Onkee nda tala ko ompito ndjoka oya tulwa po okupendutha nokudhimbulutha aantu, nkene omuntu ta vulu a kwatathane naKalunga. Unene mboka twa nyengwa notwa mana po omayeye konkalo ndjoka tu li muyo.

Kombinga onkwawo omuhungwamwenyo oye mwene ha tokola noha hogolola ngoka a hala e mu hunge omwenyo, na kale ogwoludhi luni nenge opompito yini. Onkene ku mbono hatu shi ningi nenge twa pumbwa ehungomwenyo pampito ndjono, otu wete oshoopala naunene kumbono she tu kwatha.

Pahapu ndhino wa kutha (Mat 6:5 - 6) shoshene itashi tsu ngaa shili kumwe. Ihe owa ndhindhilika tuu kutya mehungomwenyo omu na ompango tayi ti kutya, hamuhungimwenyo ta hungile omuhungwamwenyo mondunda hayi lalwa nenge yi na iinguma?

Ohapu ndhino wa kutha (Mat 6:5 - 6) Otadhi longo omuntu mwene nkene e na okugalikana, ihe itadhi longo nkene wu na okugalikanena omuntu. Mpaka oyo tatu adha eyooloko.

## Etsomukumo

Aayakuli yetu pambepo, mboka mu li aahungi yoomwenyo dhetu paRadio, tse aahungwamwenyo otatu mu pandula notatu mu tsu omukumo, kutya tsikileni andola natango ngaaka. Oshampa owala shi ningeni mombepo yashili nopwaa na omakoto gomutondi nenge okugwaaleka oshigwana na pamukalo gwontumba nenge gwongandi.

## Iyambo Ndilimekelyakalunga Ondangwa

## Emanguluko ohali eta oluhepo, oshili tuu?

Vanamibia vakwetu, tu kotokeni, osheshi omutondi woshiwana eshi ota xumu komesho noineya yaye. Ngaashi naana a pukifa ovamwameme vamwe opo va upike ombele oyo tai va tete

ominino, moku va tula moukakunya, osho naana a hala oku tu tondifa emanguluko nokuhomona oishiindalongo yaye oyo ya manguluka. Ye ta ti ne emanguluko olo la eta oluhepo moilongo eyi

Ashike oluhepo ngaashi tali monika moumbuwawu waAngola olo oiimati yomahomono a South Africa, kali fi ngeno oiimati yemanguluko loshilongo osho, aaye.

Ohai kala nda eta onghenda ngeenge hai tala ovamwameme ovo va nwehano nale komutondi, eshi tava uhala tava popi nai oukomoni (comunism), nohai kala nda hala okupula. Hano oukomoni oo tau hepeke ovanhu moNamibia ngaha?

Oukomoni omwa shiiva ngahelipi owii wao ngeenge omwa nyengwa okushiiva owii waSouth Africa oo tamu longele, ye oye omukomesho woxuna aische i li moNamibia no mo SA? Omu shi shii tuu kutya omutondi womutondi woye okaume koye?

Fyeni oitai yomuti umwe (Namibia) naitashi dulika oitai imwe otai ima eenyandi imwe omaapela. Ngeenge osho ngaha nena nye omu li mepuko noshwana otashi mu talele kombada yeenyala.

## Pax.H.Kamati Ondangwa

## Omukumo kAanamibia aakwetu

Otandi indile kaakwashigwana aaholike tu kondjeni neitulomo enene shi vulithe shito opo tu ka thikeni kemanguluko lyashili. Otwa pumbwa elongelo kumwe okuza kuuzilo sigo okuuningino nokolundume sigo okulukadhi kwoshilongo.

Ehanganano lyopashigwana oSWAPO yaNamibia opo yi li nale moka atuhe tu na okukala iilyo nokwiitaala omakankameno galyo ngaashi gi itaalwa ko wo nokuuyuni auhe okupitila mongonga yIigwanahanganano nomehangano lyuukumwe waAfrika. Ano epangelo lya S.Afrika niilonga yalyo naakalelipo yalyo natu ya kaleni kokule.

Epangelotaaguluko ndi lya dhikwa muno kuBotha, nooministeli adhihe dhi li mo otu shi shi nale atuhe, kutya mbyono iitululisa yaPretoria mbi ta longitha okukala emanguluko lyaNamibia moshipala

Kaagundjuka amuhe yaNamibia otandi ti kune kutya kaleni kokule nuukakunya. Okuwatela oombulu nokudhipaga aamwanyoko anirwa ota mu dhipaga ootoli, mbyono oyo iihuna, mbi haku tiwa oyi vule yombwa.

Pehulilo otandi ti, tu kaleni kumwe moSwapo Aanamibia atuheni. Etheni uukakunya woombulu tu longeleni kumwe noPLAN etanga lyokakulumbwati lyaSwapo, opo tu mangululeni Namibia lyetweni ehilike. Aamwaameme yetu aaholike ya ze muupongekwa noya galukile koshilongo ongo-mpendafule, oondjayi dhi ete emanguluko lyetweni. Ekondjo nali tsikile emanguluko oshili.

## Patric Ingula Windhoek

## Ondjokonona yanakusa Monika Nekwaya



Meme Monika Mululu Nekwaya okwa valwa 1946 mOnambahu muAmuteya, ku yina Kaarina (Niipaya) Mponvo nahe Sakeus Shilongo. Okwa

putukile megumbo lyahe nayina mOniitentu muAmuteya. Okwa tameke osikola yongula pO-mbongela sigo a piti po e ta yi kOnyaanya.

He Nekwaya okwa mana oondjenda dhe muAuguste 1960 kuuwehame. Monika okwa kala mokagumbo ka yina. Okwa kolekwa 30.9.1962. Okwa kongwa po komumati gwe Tomas Johannes (Kanku) gwomOnambahu muAmuteya. Oya hokana 13.8.1964 mOnyaanya.

Omuwa okwe ya pe omagano oyana omulongo, aamati yahetatu naakadhona yaali. Okankelo oJosef Toivo Tulela hoka ka thigwa po ke na oomwedhi ntano netata. Monika okwa li omunashilonga megongalo Onyaanya, omuwiliki gwoomeme pO-mbongela, omudiakoni momikunda nomukuluntu gwegongalo. Okwa li wo kuume ketumo.

Omasiku 14.4.1988 meme Monika okwa adhika kuuvu wombaadhilila, mboka wa li wa faalele newi lyokupopya sigo okusa kwe. Okwa falwa mOnandjo-kwe moka a ningi mo omasiku gatatu ageke. Eti 18.4.1988 okwa zimbuka muuyuni mbuka mepipi lyomimvo 42. Efumviko olya ningilwa 20.4.1988 mOnyaanya.

Omuwa oye e tu pele oye wo e tu kutha. Eimbilo 627 mOmaimbilo.

Ester N. Nekwaya  
Nehale Sec. School



Ondumbo otai teya po oshiwana

Oku na ovakwashiwana vamwe va hala va nyateke ongudu yaSWAPO nomadiladilo avo taa di mondubo, mefupa nomoumbada wokutilafana moutungamaumbo.

Oto hange omunhu taa kongele omushiinda shaye ile umwe woposhilongo shavo ehokololo lii, te li toto mwene nounghulungu, a fa e li uda la dja modjo yonhumba, ngaashi oshihopaenewa:

Ngadi vati 'ovamati' otava ti ota longo kuvali shaashi oha longo ko CDM, ye oku na ofitola, ota manenepo ava ihava i koilonga eemhito!"

"Ngadi oku na oBotolo, ye oku na okabesa kopate, ota manene po vakwao"

Ngadi omulongi (oHoof) yofikola ye oku na ondalasipot kopate, ota manene po vakwao eemhito"

Onda hala okulondwela Ovanamibia unene ovo mwokoumbanganhu, kutya inamu shinda oSwapo neendubo deni. OSWAPO oi lile po ovanhu; kai fi ongudu ipu i nweewe mo nokomadiladilo taa di mondubo. OSWAPO oi na ekotamhango la kola la nyengwa okunwefwa mo nokuSouth Africa.

OSWAPO otai kondjifa oukoloni nexwo lomukolonyekwa ta xuxwa komukolonyeki (omutilyaane) Eenghedi dimwe tadi kumu ngehe Ovanamibia tava xupu, otadi ka wapalekwa ngee le uya momake etu.

Shalongo Sem  
Windhoek

### Wedelako mukweni keshiivo olo e shi

MOmukwetu No.13 omwa nyolwa oshipopiwa tashi ti; ovakulunhu kave na sha nemanguluko, oshinima shovanyasha.

Omanga mOmukwetu No.22, hqilwa umwe ta ti edi dokutya emanguluko oshinima shovanyasha kadi shi doshili. Okwa yelifa kutya emanguluko oshinima shomunamwenyo keshe.

Konyala ovakulunhu vetu ovo unene ve li pyakidila nokuninga omalongekido e na sha nemanguluko, manga fye ovanayasha ovo tu li oshiwana shokomongula itatu kumuko komalongekido. Poo kape na nee ou a shiiva kutya emanguluko loshilongo eshi otali ya naini. Otashi dulika natango okonima yeedula donhumba ngoo manga.

Ope na eyooloko pokati kopaise nonakwiwa. Oupaife owetweni atusheni ovanamwenyo. Ndee onakwiwa oyetu atuke ovanayasha. Otashi dulika kefimbo loshilongo tashi manguluka voo ovakulunhu vetu itava ka fika ko vali.

Hano onghatu yotete yokulipyakidila nemanguluko loshilongo ngeno oi katukwe ngaa kovanyasha unene shaashi ofye hatu ka tyapula onakwiwa, ile tai ke tu hepekelwa.

Ohatu hale okuuda ko epuko koipopiwamaye ye yOshiwambo, nohatu i landula papuko. Ngaashi eshi; "Sha wana metiti omukulunhu e shi yandja." Paife otwa hala okutya nani emanguluko natu li kongelwe kovakulunhu vetu, opo li tu wanene ngaashi eyele tali ti.

Ovakulunhu nave tu palele ashike ondjila oyo tu na okweenda fye tu li taataye, tu li kwate ava tuvanyanyamaulu. Nongeenge otwe li hange diva manga ovakulunhu vetu ve na omwenyo, fye tu ka tyapule pamwe navo oshivilo shemanguluko loshilongo shetu tu udite ombili. Ongaashi omumati ta ningi oshivilohombolo pefimbo olo xe naina ve na omwenyo. Nava ka kuwilile nee moshivilo shemanguluko la longekidwa kovana.

Vanyasha inatu lindedemekeneni. Omutondi tu mu lwifeni twa manamo shili. Inatu pitikeni vali tu kwatweko komahangano omatango nst, ngaashi vakwetu ovo va kwatwa ko nale.

Simeon Th. Hamukwaya  
Omukuto waKaisa

## Eilongekidho lyOmukwetu 1989

1. Ondando yoshifo shOmukwetu okulanda kooshimwe omumvo tagu ya 1989, oosenda 50c.
2. Komumvo muNamibia na SA R8,00
3. Pondje yaNamibia na SA R20,00 komumvo. Ndjika oyo wo ondando yoshifo shomondhila.

Aagongeli yomadhina gaaleshi nane wo aahalithi yoshifo ooshimwe nashimwe, ndhindhilikeni ano elunduluko ndika. Omuntu kehe ota vulu okulanditha nenge okugongela omadhina gaantu yopomudhingoloko gwe.

Amushanga gwOmukwetu

### Ovanhu ovaHolomende

MOmukwetu No. 15/1988 omwa holoka omakumaido kombinga yokutauluka ounyasha kondje yoveta. Noukadona vati nava futwe R800. Osha ulikwa yoo kutya ovakulunhu ove di hafela unene. Okwa yelifwa yoo kutya R800 ohadi eta ouwa washike? Osho yo ngee inadi yandjwa, pamwe omumati obotjotjo ile ke na oilonga. Eshi otashi londeke ashike omwaalu womahengu pombada.

Opo omukundu u xwepopale, ovawiliki vetu ovakwamhepo novawiliki vetu vepangelo nava ongale pamwe, va tule oshinima osho shetauluko lounyasha poshitaafula. Etokolo ndishi R800 di na okufutwa? Hano nadi futwe.

Ovanayasha vahapu ovakriste va shaselwa mo-maongalo etu, ngee va tauluka ounyasha inava kwatelamo vali ovakwapata vavo nooxekulu, vati kepata kwe uya oshikolo. Oshinima nashi yukilile onaku shi ninga. Fiku wa udafana lwotete, ou a lipo olyelye e he shi Kalunga ou iha hondamwa kusha?

Omukriste ta tauluka ounyasha kondje yoveta na fute.

Oveta No.1/1988

Okakadona nomulumenhu nava futile eongalo lavo R200 keshe umwe. Tav a futile moshinyangaongalo shavo, tava perwa okambapila komafutulo. Nofuto tai ingidwa meongalo kutya Nima naNima va futa eshi va tauluka ounyasha kondje yoveta omwaalu R400. Omufita na ingide ngadshi ha ingida shito ovo va hala okudika omaumbo avo medina lOmwenene.

Oveta No.2/1988

Okakadona nomulumenhu tava i kombelewa yaMangistrata kOndangwa va ka fute R200 keshe umwe R400. Opo nee omwaalu wa wana ou na okufutwa R800.

Ova futula Kalunga R400. Shaashi ovo ovanhu vaKalunga naHolomende. Pamwe ouhengu tau shuna pondodo yopedu.

Ku Ndilimeke Lasarus  
Ouhongo - Engela

## ESO

Kuku Aina Kasamane (96) megongalo Ompundja mUukwambi okwa mana oondjenda 26.7.1988. Okwa thigi ko oyana yahamano, aatekulu naatekulululwa. Omusamane okwa tekele nale. Eps 103:15 - 19. Ehanganano 400

Andreas Shilongo  
Oranjemund

+++++

Tate Milisiolo Hafunda (77) e tu tekelele meongalo, Okatana okwa kala mEpuku popepi nEndola. Okwa fiya ko ovana 11 nouatekulu 52 novatekulululwa 10. Eimbilo 644

Jonas Hafunda  
Arandis

+++++

Meme Serafina Nangula Wilhelm (74) meongalo Ohalushu 30.8.1988 mouyehame wefimbo lile. Okwa fiya ko omushamane waye ovana 7 ovatekulu 66 novatekulululwa vatano,

Philippus N.Heita  
Omatunda - Ohalushu

+++++

Omasiku 19.12.1987 kuku Taimi Alweendo (104) okwa li e tu thigi po muuwehame wethimbo efupi. Oyana 6, aatekulu 76 naatekulululwa oyendji Eimbilo 500 Job 7:1 - 22

Kambonde Festus Nakawa  
Nangola Secondary School

+++++

Tate Andreas Ashipala (84) Onaanda, okwa mana oondjenda muuwehame wethimbo ele. Okwa thigi ko oyana nomukulukadhi gwe.

Loid Fudheni Ashipala  
Swakopmund

+++++

Meme Elizabeth Tomas, nedhina lya tseyika nawa Ndokotola, Ondundu mOkapongo, okwa mana oondjenda muMai nuumvo, muuwehame wethimbo ele. Okwa thigi ko oyana 3, aatekulu ye naamwayina yaali. Eimbilo 630 Eps 84:1 - 13

Ndemwaaluka I. Mary  
Omafia Ombalantu

+++++

## EFATULULO KIIFO

Aawiliki yikandjongeleki yOngeleki yaELCIN moshigongi shawo sheti 6-9.10. 1988, mOngwediva, oya kundathana shoka Oongeleki muNamibia dha ningi po, kombinga yomakuyunguto moosikola miikako ya zi ko. Oshigongi otashi koleke omakankameno gOngeleki moshigwana shika.

Oshigongi sho sha tala kutya omukundu nguka inagu pwa po natango, otashi indile noshimpwiyu oshinene Oongeleki pamwe nomahanganano gaanasikola nookomitiye dhaavali moshilongo dhi tsikile nokukonga ondjila yokumana po omaupyakadhi ngaka moosikola.

Oshigongi osha koneke wo neyeme enene kutya aanona oyendji sho inaa kala mootundi konyala ethimbo kehe, oya kala ya kalela ondjila yoteya ya yelutha iikaha uuna omaloli gomakakunya taga piti po nokuhehela ngeyi iikulya komakakunya.

Oshigongi otashi pangula omaihumbato gaanona ga tya ngeyi, nosho wo aakwiita mboka haa ende taa umbile aanona iikulya, oshoka iinima mbika ayihe oyo eshundulo lyuuntu. Oshigongi oshu uvite wo, kutya aavali nooyene yiilongo, oye na oshinakugwanithwa oshinene shokuhulitha po omikalo ndhika dhi nyanyalitha.

# RUDOLF BAHM

## Omupangeli gwootundi MOSHAKATI

*Mpaka otandi tseyithile aayakulwa yetu ayehe, kutya iilonga yokupangela ootundi, okulanditha po oompe nokwoopaleka ndhoka dha teka, okutula ko omakende nuumanya, itatu yi longele we metungo JAMAICA INN.*

*Ngashingeyi otu li mpaka mOshakati metungo lya ENOK (BBK), mpeya hapa kala pwa thikama aluhe omaloli goeiskilima (Roomys). Shika otashi ti elalakano mpaka, oku ku etela eyakulo ndika popepilela, waaha pumbwe we okufala nenge okutuma ootundi dhoeye kUushimba.*

*Ohatu landitha wo ootundi onkulu kondando yi li hwepo, onkene tu talela po negele to piti pOshakati.*

Omusamane Hofeni Malakia (62) okwa mana oondjenda 28.7.1988 momukunda Okathakamumbwenge mOndonga

Josef S. Niimbundu  
Tsumeb

+++++

Ohandi yandje omahekeleko kowakwaHamhata aveshe omolwa meme Lusja Helao e tu fiyapo 17.7.1988. Vakwetu hekelekweni naame yo ondi li moluhodi pamwe nanye. Ekundo leni 2 Kor 5:1 - 8

Martin E. Vateimo  
Ohangwena

Kuku David Nelago mEtilahi, mOkaku mOndonga, okwa mana oondjenda 28.7.1988. Okwa thigi ko omukulukadhi gwe nomwana gumwe, naatekulu naatekulululwa.

Helena Ndimelago Amadhila  
Eloolo

+++++

Momukunda Onanyege mOnayena, omusamane Simon Johannes Iilonga lya tseyika nawa Ekuma Mbeeli omuna gwagumwe gwomaashashwa yotango mOwambo, okwa mana oondjenda 5.5.1988. Okwa thigi ko aamwayina 2, oyana 11, aatekulu 59, natekulululwa 14.

Okwa kala elenga lyomukwaniilwa Martin Kadhikwa, hugunina okwa kala oshilyo shongundulwiimbo mOnayena. Joh 5:1 - 5 Eimbilo 400

Katrina Ndapewa Mbeeli  
Onayena

+++++

Monangama mOngenga, mOukwanyama meekulu Johanna (Nandjebo Nelumbu (107) okwa xulifa oweenda waye 21.6.1988 mouyehame wefimbo lixupi. Okwa fiya ko ovana vaheyali, ovatekulu 43 novatekulululwa 83 novatekululululwa vahamano. Eimbilo 493.

Ileni T. Mumwoye  
EEngendjo Secondary School

+++++

Omukulupe Salomo Tomas Kangundo (83) Olukonda, a hulitha 9.8.1988 moshipangelo mOnandjokwe. Okwa thigi ko aamwayina yaali, oyana 13, aatekulu naatekulululwa oyendji. Eimbilo 426 Eps 92:1 - 16

Maria K. Salomo

## OMUKWETU

Oye oshifo shOngeleki Onkwaevangeli paLuther yomu SWA/NAMIBIA.

Ohashi nyanyangidhwa mOshinyanyangidho shOngeleki mOniipa.

Omukuluntu gwoshifo omumbisofi Kleopas Dumeni.

Amushanga gwoshifo omusita Sebulon Ekanjo.

Ondando yOmukwetu muNamibia naSouth Africa R6,00 komumvo.

Palwe muAfrica R10,00 nokombanda yomafuta R14,00 komumvo. Mondhila R17,00.

Oondando nomambesitelo agehe naga tumwe kOmukwetu, Oniipa, P/Bag 2013, Ondangwa 9000, N A M I B I A.

ELOC PRINTING PRESS  
PRIVATE BAG 2013, TEL. (06762) 11, TELEX 56-3257 WK  
SWA/NAMIBIA

## NDHINDHILIKA

Ohatu futu 20% koshifo kehe to landithapo nenge oopelesenda 10% komadhina gaaleshi we ga gongela. Ngoka wa hala okuya meyakulo ndika, tuma owala edhina lyoye kOMUKWETU, P/Bag 2013, Ondangwa, 9000, nomwaalu gwiiwo mbyoka wa hala u kale ho landitha.